

daten wurden gescheht auff 1600. st. ohn den Capitän Gardot selber/ vnd seine Befelchhaber. Den Bürgern durch vnderhandlung des Herren von Tempel/ vnd in betrachtung des Brands so in der Statt entstand/ ward ire ranson geschenckt/ dargegen verehrten sie Graff Moris mit 3. fuder Weins. Aber das Stettlein brant dieselbe nacht auff 5. oder 6. Heuser nach ganz ab / durch was versamnuß weist man nicht.

Belägerung vnd einnemung der Stett Enschede/ Oldensiel/ vnd Otmarsen. Geschehen im Jar 1598.

Nachdem Gr. Moris oberzehlter gestalt innerhalb 9. Tagen diese fast vnberwintliche vestung (die viel stercker dan Berck/ Mors/ oder Groll geacht wirt) mit der hülff Gottes durch vnaußhörliche arbeit erobert/ vnd gute anordnung gethan die Wall wider auff zu bawen/ auff der Gemeinde vnkosten / so hat er abermals seinem Kriegsvolck / welches er gedachte nach Enschede/ Oldensiel/ vnd Otmarsen zu führen/ aber kaum in 4. Tagen geschehen konte/ erwz ruhe vnd erfrischung müssen zulassen/ wegen des beschwerlichen vnebnen wegs: doch durch grossen fleiß ist das Läger den 8. Octobr. zu Enschede ankommen / so von Erden einen Wall vnd 2. Gräben / einen aussen/ den anderen inwendig hatte: darauff die Hauptleut Basquez vnd Groffelt/ nachdem die Statt auffgefodert worden/ zwen zu Graff Moris hinauß geschickt/ das geschütz